

DISSERTATIONE TERTIA  
**IMPVTATIONEM CVLPAE**  
CIRCA  
**EMTIONEM VENDITIONEM**

---



EX CONSENSV

ILLVSTRIS JCTORVM ORDINIS

PVBlice PROPONENT

PRAESES

**IO. IVSTINVS SCHIERSCHMID**

PHIL. ET I. V. D.

ET RESPONDENS

**CAROLVS GODOFREDVS MIRVS,**  
SCKAESG. MISN.

---

DIE XVI. DECEMBR. ANNO M DCC XXXV.

---

LIPSIÆ  
LITTERIS GABRIELIS TROGH.





## PROOEMIUM.



Generalia ista, quibus imputatio culpae circa contractus determinatur, in secunda quidem dissertatione proposuimus, simulque et ad speciales contractus innominatos scilicet atque reales ita applicauimus, ut horum contractuum notiones, earumque legitimam formationem ex Elementis Iuris Ciuilibus praesupponeremus; verum quoque singulas imputationes culpae circa contractus ita traderemus, prout contractus in rebus publicis recepta fuerint. Cum igitur §. 1. l. 3. t. 4. Elem. Iuris Ciuilibus probabiliter concluderem, plurimos consensuales contractus demum post innominatos et reales inter gentes frequentatos fuisse; inde in hac tertia, imputationem culpae circa contractus consensuales absolvere quidem constitueram; At cum generalia pactorum sub conditione initiorum, quae contractibus consensualibus magis, quam realibus congruunt, praemittere coactus fuero; (quia nimirum ista generalia imputationem culpae circa contractus cum primis consensuales varient,) et ista tamen generalia plures paginas impleverint. Idcirco in hac tertia ultra imputationem culpae circa emtionem venditionem procedere non licuit, ita, ut imputationem culpae circa reliquos contractus consensuales, quartae relinquere cogar,

## §. I.



St autem *conditio* euentus futurus incertus. Qui vel a mero casu, vel a voluntate eius, cum quo nobis res est, ab viroque dependere potest, et in-de efficit conditionem *casualem*, *potestatiuam*, et *mixtam* L. 60. ff. de *condit. et demonst.*

## §. II.

Actio libera ratione executionis obligationem moralem admittit §. 18 Diff. I. Actio libera ratione executionis redit ad actionem, cuius existentia a voluntate nostra dependet. (§. 17. l. c.) Quare euentus futurus, cuius existentia a voluntate nostra dependet, admittit obligationem moralem: Verum euentus futurus, cuius existentia a voluntate alterius dependet, cum quo nobis res est, dicitur conditio potestatiua (§. 1.) et obligatio potestatiua etiam est obligatio moralis. Ergo *conditio potestatiua obligationem pactitiuam admittit.*

## §. III.

Id, in quod pacto iusto consentimus, existentiae reddere ex pacto perfecte actu obligati sumus, §. 12. Diff. II. *Quare is pacifcentium, qui in conditionem potestatiuam pacto iusto consentit, ex pacto ad eam existentiae reddendam actu obligatur (§. 1. 2.)*

SCHOLION: Actualement obligationem pactitiuam ad conditionem potestatiuam existentiae reddendam asserere, antequam possibilitatem eiusdem obligationis euicerim. methodi haud conueniens esse putauit.

## §. IV.

Hud implicat, quin duo eandem voluntatem de aliquo negotio sub euentu demum futuro incerto effectui dando declarent. Cum vero identitas binarum voluntatum de aliquo negotio effectui dando vel ab eodem reprimendo consensum mutuum in idem placitum constituat (§. 2. Diff. II.) et euentus futurus in-

cer-

certus conditionem absoluat (§. 1.) Inde non implicat, quin consensus mutuus in idem placitum sub conditione demum determinetur. Verum consensus mutuus in idem placitum pactum efficit, *quare pactum sub conditione ab initio initum non implicat.* Unde simul apparet, quid sibi velit pactum purum ab initio, quo scilicet consensus paciscentium mutuus in idem placitum *non demum* subeuentu futuro incerto determinatur.

## §. V.

Pactum ab initio purum est pactum, quo consensus paciscentium mutuus in idem placitum non demum subeuentu futuro incerto determinatur (§. praec.) Interea tamen non implicat, quin illi consensui mutuo puro in idem placitum, eodem quidem tempore, sub euentu tamen futuro incerto, dissensus eorundem paciscentium mutuus determinetur. Id quod *pactum conditione resolutiua auctum vocant*; vt distinguerent ab eo, quo consensus mutuus in idem placitum sub euentu demum futuro incerto determinatur, quod *pactum ab initio sub conditione suspensiuum initum appellant.* L. 2. ff. de in diem addict.

## §. VI.

Pactum sub conditione suspensiuum est pactum, quo consensus mutuus in idem placitum subeuentu futuro incerto determinatur (§. praec.) Per id, sub quo alterum determinatur, intelligitur, cur alterum circa rem coexistat, vel alterum sequatur, uti ex Logicis patet. Quare per existentiam conditionis intelligitur, cur, circa pactum sub conditione suspensiuum initum, consensus paciscentium mutuus in idem placitum coexistat. Nunc autem id, per quod intelligitur, cur alterum coexistat, vel alterum illud sequatur, efficit, vt alterum cum illo connectatur, conf. *Illustr. WOLFFII* (Cosmol. lat. §. 11.) Vnde apparet, quod *existentia conditionis circa pactum sub conditione suspensiuum initum cum consensu paciscentium mutuo in idem placitum connectatur.*

## §. VII.

Existencia conditionis circa pactum sub conditione illa suspensiva initum cum consensu paciscentium mutuo in idem connectitur, (§. præc.) ex consensu paciscentium mutuo in idem placitum pactum perfectum euadit (§. 2 et 4 Diff. II.) Quare *existencia conditionis pactum sub conditione suspensiva initum perfectum efficit. L. 20. ff. de condit. L. 8 p. 1. ff. de C. E. V.*

## §. VIII.

Existencia conditionis circa pactum sub conditione suspensiva initum cum consensu paciscentium mutuo in idem placitum connectitur §. 6). Quare *sublata seu cessante conditione circa pactum sub conditione suspensiva tollitur consensus paciscentium mutuus in placitum et consequenter pactum expirat. L. 8. pr. ff. de Per. C. E. V. L. 37. ff. de contr. E. V.*

## §. IX.

Si duo vel plures consensus suum mutuum in idem placitum sub futuro euentu determinant, tum per eum (consensum) tanquam factum intelligitur, quod utrique velint existentiam, vel non existentiam euentus illius incerti expectare. Cum autem identitas binarum voluntatum facto declarata de aliquo negotio effectui dando, vel ab eodem reprimendo efficiat consensum mutuum tacitum (§. 2. Diff. II) inde si duo vel plures consensus suum mutuum in idem placitum sub euentu futuro incerto determinant, tum per (consensum) simul intelligitur, quod utrique tacite in expectationem existentis vel deficientis euentus incerti mutuo consenserint. §. cit, Quum autem consensus mutuus in idem placitum tacitus, pactum tacitum efficiat (§. 4. l. c.) Inde apparet, quod per consensum mutuum in aliquod placitum sub euentu futuro incerto determinatum, simul intelligatur pactum tacitum in expectationem euentus illius. Cum autem ea, per quorum unum intelligitur alterius rei coexistentia, dicantur inter se connexa *conf. §. II. Cosmol.*

Lar.

*Lat. Hinc constat. quod consensu mutuo in idem placitum sub euentu futuro incerto determinato pactum quoddam tacitum, de expectanda conditione sit connexum. conf. ILLUSTR. RECHENBERGII Tr. de Reg. jur. pr. L. III. 1. 1. §. 2.*

## §. X.

Cum consensu mutuo in idem placitum, sub euntu futuro incerto determinato, ab initio pactum quoddam, tacitum de expectanda existentia vel non existentia conditionis est connexum (§. praec.) Quare sub conditione suspensiva paciscentes ab initio iam iam pactum de expectanda existentia vel non existentia conditionis incunt (§. 2, 4). Diff. II. Cum autem illud alteri praestare obligati simus, in quod pacto iusto consentimus (§. 12. l. c.) & nos circa pactum nostrum iustitiam illius praesupponamus. Hinc constat, *quod sub conditione suspensiva paciscentes obligati sint ad conditionis vel existentiam vel non existentiam expectandam. L. 7. pr. ff. de Contr. E. V. L. 43. §. p. ff. ne Aedil. Edict.*

## §. XI.

Consensus mutuus in idem placitum, sub euentu futuro incerto determinatus, efficit pactum sub conditione suspensiva initum (§. 5.) et existentia illius euentus seu conditionis pactum illud perfectum reddit (§. 7). Quare *existentia conditionis efficit, ut in pacto sub conditione suspensiva inito duo pacta perfecta inter se connectantur.* Cum autem connexa a se invicem inseparabilia sint. Inde concipitur, cur leges pactum sub conditione suspensiva initum existente conditione ad initium reducant, fingantque, ac si pactum illud ab initio pure initum sit. *L. 20. ff. de condit. inst. L. II. §. 1. ff. qui pot. in pign.*

## §. XII.

Ante existentiam conditionis vel ejusdem defectionem pactum quidem principale, quod sub pacto sub conditione inito continetur, neque perficitur neque deficit (§. 7. 8.) paciscentes tamen

ex

ex pacto tacito accessorio ad expectationem conditionis vel existentis, vel deficientis obligantur. (§. 10.) Vnde apparet, quod conditio, quae pacto sub conditione suspensiva inito inest, ex pacto tacito accessorio suspendat et pacti principalis futuram perfectionem et defensionem. L. 1. pr. ff. Contr. E. V.

## §. XIII.

Pactum sub conditione resolutiva initum est pactum ab initio purum, quo quidem eodem tempore sub euentu tamen incerto futuro dissensus eorum paciscentium mutuus determinatur. (§. 5.) Per id, sub quo alterum determinatur, intelligitur, cur alterum circa rem coexistat, vel alterum sequatur. Quare per existentiam conditionis intelligitur, cur circa pactum sub conditione resolutiva initum dissensus eorum paciscentium mutuus pactum prius sequatur. Sed id, per quod intelligitur, cur unum alterum sequatur efficit, ut unum cum altero connectatur. *conf. §. cit. 11. Cosm. lat.* Quapropter *existentia conditionis circa pactum sub conditione resolutiva initum efficit, ut cum pacto priori puro dissensus eorundem paciscentium mutuus necessario connectatur conf. ILLUSTR. RECHENBERGII Tract. l. c.*

## §. XIV.

Existencia conditionis circa pactum sub conditione resolutiva initum cum pacto ab initio puro, seu priori perfecto dissensum eorundem paciscentium mutuum actu connectit (§. præc.) Nuncautem dissensus eorundem paciscentium mutuus pactum ipsorum prius perfectum tollit. (§. 96. Elem. L. 3. Tit. 1.) *Quare existentia conditionis circa pactum sub conditione resolutiva initum pactum prius perfectum tollit. L. 1. 2 ff. de in diem addition.*

## §. XV.

Existencia conditionis circa pactum sub conditione resolutiva initum cum pacto primo perfecto dissensum eorum paciscentium mutuum demum actu connectit (§. 13.) Si unum connexum necessariorum tollitur etiam alterum tollitur. *Quare defectio condi-*  
tio-



*tionis subsecuta circa pactum sub conditione resolutive initum dis-  
sensum eorundem paciscentium alias futurum tollit, et consequenter  
pactum prius perfectum a futuro interitum liberat, seu pactum cor-  
roborat L. 1. ff. de L. Commiss.*

§. XVI.

*Pactum vel contractus sub conditione scripturae super illum  
conficiendae initus est pactum, quo consensus paciscentium mutuus  
sub conditione potestativa determinatur (§. 1.) & consequenter  
pactum sub conditione suspensiva initum (§. 5.).*

§. XVII.

*Quantitas in jure dicitur genus inferius numero determina-  
tum, (§. 58 l. 2. c. 14. Element.) Genus illud inferius, quod philo-  
sophi speciem vocant, omnimode determinatum non est. Quare  
pactum, quo quantitas promissa, est pactum, cujus ob-  
jectum, subsecuta demum omnimoda generis illius de-  
terminatione et annumeratione ab utrisque placita, omnimode de-  
terminatur. Subsecuta omnimoda determinatio generis cum an-  
numeratione ab utrisque paciscentium placita involuit euentum  
futurum a voluntate alterius paciscentis dependentem. Quare  
pactum, quo quantitas promissa, continet pactum, quo consensus  
mutuus in idem placitum sub euentu futuro, a voluntate alterius pa-  
ciscentis dependente, determinatur, et consequenter pactum, quo  
quantitas promissa, continet pactum initum sub conditione suspensiva  
potestativa, quam nimirum actualis omnimoda determinatio ge-  
neris placiti cum annumeratione conjuncta involuit (§. 1. et 5.).  
conf. Titii jus pr. 14. c. 2. §. 27.*

§. XVIII.

*Pactum, quo quantitas promissa, continet pactum sub  
conditione suspensiva potestativa, quam omnimoda deter-  
minatio generis placiti actualis cum adnumeratione conjun-  
cta involuit (§. prae.) Cum autem quantitas sic genus numero*

B

deter-

determinatum (§. cit.) Inde pactum, quo genus promissum, continet pactum initum sub conditione suspensiva potestativa, quam sola actualis omnimoda tamen generis placiti determinatio, quorsum etiam, ut ajunt, demonstratio pertinet, involuit. *conf. Tit. l. c. §. 26.*

SCHOLION. Istam propositionem ex demonstratione §. præc. triadita consequentia immediata per subtractionem deduximus.

### §. XIX.

*Arrba* dicitur pars pretii rei commutandae sub conditione poenitentiae in alterum transferenda. Ast poenitentia continet nolitatem ejus, quod antea aliquis voluit, *conf. 464. Metaph. ILLUSTR. WOLFFII*; Quare contractus commutationis, cui arrha accedit, continet pactum ab initio quidem purum; cui tamen sub conditione potestativa eorundem paciscentium identitas nolitatum seu dissensus mutuus determinatur. Sed pactum ab initio purum, cui sub conditione dissensus eorundem paciscentium mutuus determinatur, est pactum sub conditione resolutiva initum (§. 5.) *Ea propter contractus, cui arrha accessit, dici potest contractus conditione resolutiva initus. conf. Titii jus pr. l. c. §. 22.*

### §. XX.

Hiscæ præmissis ad imputationem culpæ circa contractus consensuales accedere, emtionemque venditionem primo loco collocare licuit, ejus notionem *Lib. III. Tit. 2. §. 14. Element. euicimus*, quod sit contractus consensualis de re nobis propria externa in alterum transferenda. Cum igitur res externa alicui propria et res singularis et genus quoddam et quantitas esse possit. *Inde concipitur quod emtio venditio et rei singularis et generis et quantitatis esse possit.*

### §. XXI.

Porro cum emtio venditio sit contractus consensualis (§. præc.) et consensuales cum primis contractus sub conditione suspensiva et resolutiva iniri possint (§. 5.) Hinc constat, quod concipi possit

*emtio*

*emptio venditio sub conditione suspensiva vel resolutiva inita. quarum posterior in iure civili Romano addictio in diem audit* conf. L. 4 §. 5. 6. L. 5. L. 14. pr. et §. ult. ff. de in diem addict.

§. XXII.

Res singularis nobis propria vel indiuidua esse, vel complexum rerum singularium sub uno vel diverso genere contentarum comprehendere potest, conf. §. 15. Sect. II. Addit. Elem. Vnde emptio venditio rei singularis, vel *emptio venditio rei singularis indiuiduae seu simplex* esse, vel emtionem venditionem rerum singularium universalem et quidem vel cum admensuratione, aut adnumeratione coniunctam, aut admensurationem et adnumerationem destitutam inuoluere potest. Haec dicitur *emptio venditio rerum singularium per auersionem*, überhaupt, in Bausch und Bogen, *illa emptio venditio rerum singularium ad mensuram, pondus vel numerum dicitur*. L. 40. §. 2. ff. de C. E. V. L. 4. §. 1. L. 42. ff. de A. E. V. conf. B. TITII *Iuspr.* l. 4. c. 2. §. 8. adde STRVVII *Syntegm. Iur. Ciu. Exerc.* XXXIII. §. XI.

§. XXIII.

Res externae singulares nobis propriae existunt et simul sub domino nostro continentur, uti aliunde constat. Ponas itaque, quod res quaedam vel non existat, vel quidem existat, attamen dominio nostro non contineatur, tum res ista externa singularis nobis propria dici nequeat, adeoque, ut res externa singularis nobis propria sit, requiritur, ut non solum simpliciter existat, sed quoque sub dominio nostro contineatur. Cum itaque res, quae propius accedit ad existentiam et inde quodammodo existere dicatur, adeoque ut res, rei singulari, per fictionem principio rationis sufficientis superstructam, et inde heuristica aequipollens considerari possit, conf. *Illustr. Wolff.* 245. *Metaphys.* Hinc constat, quod duae species rerum, rebus singularibus externis nobis propriis, aequipollentiam concipi possint, quarum prima erit res externa et exi-

stentiae simplici et existentiae domini propius accedens, quam futuribilem vocamus secundum B. TITII *Iuspr. L. IV. c. II. §. 6. et l. 8. pr. ff. de C.E. V.*, altera autem erit, res externa existens, sed existentiae domini tantum propius accedens, quam *spem iuridicam* vocare licebit secundum L. §. 1. de *Contr. E. V.*

§. XXIV.

Res futuribilis nobis propria et spes nostra iuridica est res rei singulari externae nobis propriae aequipollens. (§. praec.) Quare *Emtio venditio rei futuribilis nobis propriae, et spei nostrae iuridicae, emtioni venditioni rei singularis aequiparatur.* (§. 20) conf. TITII *Iuspr. l.c. cit. text.*

§. XXV.

Fructus ex re nostra proximo tempore nascituri sunt res externae existentiae simplici et existentiae domini propius accedentes (§. 36. l. 2. r. 2. Elem.) Quare fructus ex re nostra proximo tempore nascituri sunt res futuribiles externae nobis propriae (§. 23.) et consequenter *emtio venditio fructuum ex re nostra proximo tempore nasciturorum est emtio venditio rei futuribilis nobis propriae* conf. L. §. pr. ff. de *Contr. E. V.*

§. XXVI.

Fructus immaturi sunt res externae nondum perceptae, adeoque propriissime sub dominio nostro nondum existunt. (§. 36. l. 2. r. 2. Elem.) Interea domino tamen, cum existant, ius quoddam in fructus percipiendos competit, quod titulum dominium acquirendi inuoluit (§. cit.) licet illud sub hac consideratione dominium non sit (§. 35. l.c.) Hinc fructus immaturi sub hac consideratione plus quam spem iuridicam, involuunt (§. 23.) Quid quod cum fructus pendentes immaturi simul tanquam partes rei nobis propriae singularis considerari possint. Inde sub hac consideratione eo magis *emtio venditio fructuum pendentium immaturorum erit emtio venditio rerum singularium per auersionem* (§. 22.) conf. §. 40. Elem. l. c.

§. XXVII.

## §. XXVII.

Res, instante venatione, aut piscatione, aut aucupio acquirendae, sunt res externae existentes nondum quidem sub dominio, propius tamen eidem accedentes (§. 15. et 16. Elem. l. 2. t. 2.) adeoque pertinent ad spes nostras iuridicas (§. 23.) *Hinc emtio venditio rerum instante venatione aut piscatione aut aucupio acquirendarum pertinet ad emtionem venditionem spei nostrae iuridicae L. 8. §. 1 ff. de C. E. V.*

## §. XXVIII.

Damnum dolo vel lita culpa circa emtionem venditionem quamcunque perfectam a contrahentibus datum, ipsis ad reparationem damni dati omni tempore imputatur (§. 44. Diff. II.)

## §. XXIX.

Emtione venditione perfecta emtor certam pecuniae summam rei venditori propriae substituit (§. 20.) adeoque emtor et venditor ex emtione perfecta aequalem utilitatem percipiunt. Quare emtor et venditor ex emtione venditione perfecta simplici ad mediam diligentiam sibi inuicem exhibendam, adeoque ad damna leui culpa data refarcienda obligantur §. 39. Diff. II. L. 23. ff. de R. I. L. 35. §. 4. ff. de Contr. E. V. L. 6. pr. ff. eod. L. 54. pr. ff. de act. emt. conf. COCCII. Diff. III. de Praest. culp. circa Contr.

## §. XXX.

Si venditor custodiam rei venditae in specie promissit, tum ista promissione declarat, se velle plus, quam ordinariam diligentiam in custodienda re vendita adhibere. (§. 15. Diff. II.) Sed ordinaria diligentia ex emtione venditione perfecta emtori exhibenda est media (§. praec.) Quare venditor custodiam rei venditae in specie promittens declarat, se velle plus, quam mediam, quae maxima dicitur. (§. 114. Diff. I.) emtori exhibere. Declaratio voluntatis de re aliqua effectui danda dicitur consensus (§. 2. Diff. I.) et ad id, in quod pacto iusto seu contractu consensus, alteri exhiben-

dum obligati sumus. (§. 12. Diff. II.) Quare *venditor custodiam rei venditae in specie promittens, ad maximam diligentiam emtori in custodienda re exhibendam obligatur.* L. 31. pr. ff. de A. E. V. §. 3. Inst. de E. V. L. 35. §. 4. ff. de Contr. E. V. L. 18. §. 9. L. 38 ff. de damno infecto. conf. COCCII Diff. §. 24. et 25.

## §. XXXI.

Mere casualis rei pactitiae singularis interitus obligationem ex contractu perfecto alias competentem ordinarie tollit (§. 36. Diff. II.) Quare mere casualis rei venditae singularis interitus obligationem venditoris ad rem emtori tradendam ex perfecta emtione venditione competentem ordinarie tollit. (§. 20.) Inde *mere casualis rei venditae interitus post perfectam emtione venditionem ordinarie ad emtorem spectat.* L. 11. ff. de Per. et Com. R. V.

## §. XXXII.

Casualis rei pactitiae singularis interitus, cui dolus vel culpa unius paciscentis, tanquam concausa, accedit, catenus ad reparationem damni alteri praestandam ex contractu imputatur, quatenus dolus iste, aut culpa ex contractu imputatur (§. 38. Diff. II.) Verum ex omni contractu dolus et lata culpa imputatur (§. 44. Diff. II.) ex emtione autem venditione perfecta simplici quoque levis (§. 29.) et ex ea, qua venditor custodiam rei venditae in specie promisit etiam leuissima (§. 30) Quare *ex emtione venditione perfecta et simplici interitus rei venditae casualis, cui dolus venditoris, vel lata vel levis culpa, tanquam concausa, accedit, venditori ad reparationem damni imputatur.* (a) minus autem, si culpa tantum leuissima poneretur, (b) quod tamen in emtione venditione etiam obtinet, (c) qua venditor custodiam rei venditae in specie promiserit a) L. 54. pr. ff. de Act. E. V. L. 31. pr. L. 13. §. 3. L. 15. ff. de per. et com. R. V. b) L. 11. ff. eod. c) §. 4. 3. Inst. de E. V. L. 35. §. 4. ff. de Cont. E. V. L. 41. ff. loc.

## §. XXXIII.

## §. XXXIII.

Interitus rei venditae casualis, cui negligentia quidem domesticorum venditori subiectorum, tanquam causa, non autem levis culpa venditoris inest, ex emtione venditione perfecta simplici venditori ad reparationem damni non imputatur. (§. praec.) L. 11. ff. de P. et C. V. Illustr. RECHENB. Tr. l. c. §. 11.

## §. XXXIV.

Is contrahentium, qui interitum rei pactitiae singularis in se suscipit, ex isto contractu ad aliam rem, sub eodem genere, et pretio contentam, alteri conferendam, seu ad periculum, ut ajunt, praestandum obligatur. (§. 42. Diff. 11) Quare venditor, periculum rei venditae singularis suscipiens ex contractu obligatur ad periculum praestandum (§. 20.) §. 3. Inst. de E. V. L. 78. §. f. L. 35. §. 4. ff. de C. E. V. L. 5. §. 2. ff. commod. L. 1. ff. de Per. et com. Rei. Vend.

## §. XXXV.

Maxima diligentia adhuc actionem in potestate nostra sitam praestruit (§. 114. et 78. Diff. I) mere casualis rei interitus involuit euentum, cujus non existentia non est in nostra potestate (§. 34. Diff. II.) Quare casualis rei interitus maximam quoque hominis diligentiam transgreditur. Vnde venditor solam custodiam rei venditae in specie promittens adhuc in casualem rei venditae interitum non consentit, nec adeo sola custodia promissa ad periculum praestandum obligatur (§. 30. 34) Consentit L. 31. pr. ff. de Act. Emti L. 41. ff. loc. conf. COCCII Diff. III. §. 25. quanquam L. 35. §. 4. ff. de Contr. E. V. et §. 3. I. de E. V. propositiioni implicite contrariari videatur, sed leges istas accuratius perpendendo, apparebit, quod in istis tantum interitus rei venditae, cui tamen culpa venditoris vel saltem leuissima inest, praesupponatur.

## §. XXXVI.

Venditor in verum rei venditae pretium, quantum in eius potestate est, determinandum, ordinarie consentit (§. 20.) conf. §.

88. l. 3. t. 1. *Elem.* Vnde determinatio veri pretii rei venditae in potestate venditoris sita, est officium venditoris perfectum ex emtione venditione enatum (§. 12. Diff. II.) Quare *venditor, qui verum pretium rei non determinat, cum tamen in ipsius potestate fuit illud determinandi; non utitur viribus explendo officio sufficientibus, vel deliberate vel indeliberate (§. 28 Diff. I.) et consequenter vel dolum vel culpam committit.*

SCHOLION: Ex hoc principio decidi potest casus, quo vnus mercator A. alteri mercatori B. omnium mercium apparatus iuxta propriam emtionem, nach den Einkauf oder nach der nummer, quidem vendidit, in inventario autem mercium iuxta propriam venditionem, nach dem Auschnitt, adscriptis.

### §. XXXVII.

Ex iis quae (§. prae.) tradidimus aliisque principiis uberiori demonstratione in *Elem. Jur. Ciu. L. 3. T. 1. §. 94.* eruimus, quod is commutantium, qui alterum ultra dimidium veri pretii seu pretii ejus, quod res alterius exigit, laesit, alteri jus porrigat, aut suppletionem veri pretii exigendi, aut a pacto prorsus recedendi. Ex qua propositione, si breuitatis causa hic assumere liceat, fuit, quod, cum emtio venditio ordinaria sit commutatio (§. 20) *venditor, qui emtorem et vice versa emtor, qui venditorem ultra dimidium veri pretii, seu pretii ejus, quod merx exigit, laesit, alteri porrigat jus, aut in primo casu remissionem eius pretii, quod ultra verum accepit, et in altero casu, suppletionem veri pretii exigendi, aut ab emtione venditione ordinaria prorsus recedendi.* Quam propositionem hoc in loco vel saltem attingere, volui. Cum iam antea Viri celeberrimi Dn. IKSTADIUS in specimine de laesione enormi, et Dn. CRAMERUS Maiburg: in specimine de aequitate naturali emtionis venditionis uberiori calamo ea, quae huc spectant, exposuerint.

### §. XXXVIII.



## §. XXXVIII.

Venditor, qui vitium, quo res laborat, vel scivit, vel quidem ignoravit sed facile scire potuit tamen emptori non detegit, verum rei pretium (vel saltem quoad vitium) non determinavit, cum tamen in eius potestate fuit illud determinandi; et consequenter venditor iste, qui vitium, quo res laborat, vel scivit, vel quidem ignoravit, sed facile scire potuit, et emptori non detegit, dolum in primo casu, culpam autem latam vel leuem in altero committit (§. 36.) id, quod vitium emptori cum interitus rei, vel citra istum innotum, efficit, ut emptor sentiat malum ortum ex dolo in primo, vel lata et leui culpa venditoris in altero casu, et consequenter *damnum dolo vel lata vel leui culpa venditoris circa emtionem venditionem datum* (§. 123. Diff. I.)

## §. XXXIX.

Venditori ex emtione venditione *damnum dolo aut culpa sua lata vel leui emptori datum ad reparationem damni emptori praestandam imputatur* (§. 28. et 29.) Quare *venditori interitus rei ex antiquo vitio, quod scivit, vel quidem ignoravit, sed facile scire potuit, et emptori non detegit, apud emptorem, subsequens, ad reparationem damni dati emptori praestandum imputatur* (§. praecc.) L. 1. §. ult. C. de A&E. emt. conf. TITII Iuspr. l. c. §. 24.

## §. XL.

Si emptori vitium rei etiam citra interitum innotuit, quod venditor scivit, vel quidem ignoravit, sed tamen facile scire potuit, et emptori non detegit, tum emptor circa emtionem venditionem *damnum in primo casu dolo, in altero autem culpa vel lata vel leui datum sentit*. (§. 38.) Cum autem venditori *damnum dolo vel culpa lata et leui circa emtionem venditionem datum ad reparationem damni imputatur* (§. 28. 29.) quid, quod dolus ad maius quoddam, culpa autem ad minus imputetur. (§. 110. Diff. I.) Inde concipiendum, *cur ea casu, quo emptori vitium rei etiam citra interitum*

C

ritum

*ritum totalem innotuit, quod venditor sciuit, vel quidem ignorauit, sed facile scire potuit, et emtori non detegit, venditori damnum in prima ad reparationem omnium detrimentorum, quæ emtor ex hac emtione traxerit, in altero autem casu ad id tantum imputetur, quanto minoris fuisset emtor emturus, si ipsi detegisset conf. Illustr. RECHENB. Tr. L. III. r. 13. §. 7. adde L. 13. ff. de A. E. V.*

## §. XLI.

Tum tempore, quo venditor rei traditionem offert, emtor quoque præcise obligatur ad pretium soluendum §. 3. L. III. r. 5. Elem. *Quare emtor, cui a venditore rei traditio offertur, pretium non soluens, seu a venditore interpellatus promissum suum existentiae eo tempore non reddit, quo moraliter obligatus est, et consequenter in moram moralem constituitur (§. 39. Diff. II.)* Inde simul apparet, quod venditor in emtione venditione simplici in moram constituitur, si tempore determinato, vel eo, rei traditionem suspendit, quo ab emtore pretium offerente interpellatus. L. 4. §. fin. ff. de P. et C. R. V. L. 17. eod.

## §. XLII.

Emtor in moram moralem constitutus, eo tempore pretium non soluit, quo moraliter obligatus est (§. 39. Diff. II.) sed is, qui id, in quod pacto iusto consensit, existentiae non reddit, alterum lædit (§. 13. Diff. II.) Quare emtor in moram moralem constitutus venditori damnum infert, quod cum reparandum veniat (§. 144. Diff. I.) Inde emtor damnum ex mora sua morali venditori subnatum reparare obligatur. L. 114 ff. de V. O. L. f. ff. de P. et C. R. V. conf. Illustr. RECHENB. Tr. de Reg. Jur. pr. L. II. r. 1. §. 35. Id quod damnum emtoris mora, venditori illarum vel satis determinate aestimari seu declarari potest vel minus, si posterius ponas, tum termini damni reparationis dubii, sed in dubio sequimur id, quod minimum seu ordinarium est. Vnde ad intelligendum datur, cur in casu posteriori emtor, loco reparationis damni, usuras

*ras alias consuetas venditori praestare; in priori autem ad reparationem damni etiam citra usuras obligetur. L. f. de P. et C. R. V. et cit. Tr. L. II. t. 1. §. 35.*

## §. XLIII.

Venditor in moram moralem constitutus eo tempore rem non tradit emtori, quo moraliter obligatus est (§. 39. Diff. II.) Verum is, qui id, in quod pacto iusto consensit, existentiae non reddit, alterum laedit (§. 13. l. c.) Quare venditor in moram moralem constitutus emtori damnum infert (§. 123. Diff. I.) quod cum reparandum veniat (§. 144. l. c.) *Inde venditor in moram moralem constitutus, ad reparandum damnum emtori exinde subnatum obligatur, id, quod damnum, cum vel accurate aestimari et ostendi potest, vel minus, inde quoque in prima determinatione reparatio damni citra usuras alias consuetas in altera ad usuras consuetas venditori imputanda ad (modum praec.) L. 1. pr. ff. et L. 21. §. 3. ff. de A. E. V.*

## §. XLIV.

Venditor rei traditionem emtori offerens, cui autem emtor pretium non soluit, uti incipit viribus ad explendum officium suum, propter emtoris autem denegationem pretii officium suum in totum non absoluit (§. 20.) sed ulus virium explendo officio sufficientium dicitur diligentia debita (§. 78. Diff. I.) Quare venditor rei traditionem emtori offerens, cui emtor non soluit, vel saltem partem diligentiae adhibuit, in quam ab initio contractus consensit. Cum autem contrahens ab obligatione liberetur, qui id, in quod ab initio pacti consensit, existentiae reddit (§. 12. Diff. II.) Inde constar, quod venditor rei traditionem offerens, cui tamen emtor pretium non soluit, ab obligatione partis cuiusdam diligentiae liberetur, in quam ab initio contractus consensit. Sed diligentia in quam venditor ab initio contractus consensit est media (§. 29.) Venditor igitur rei traditionem offerens, cui tamen emtor non soluit, ab obligatione partis mediae diligentiae liberatur. Si a diligentia media pars

quædam subtrahitur, remanet minima (§. 114. Diff. I.) *Venditor itaque rei traditionem offerens, cui tamen emtor non soluit, post oblationem ad minimam diligentiam emtori in re exhibendam obligatur conf. Cocceii. Diff. III. §. 25. in medio.*

## §. XLV.

Venditor rei traditionem offerens, cui emtor tamen non soluit, post oblationem ad minimam diligentiam in re emtori exhibendam obligatur (§. præc.) Verum tum tempore, quo emtor, cui venditor rei traditionem offert, pretium non soluit, emtor in moram constituitur (§. 41.) *Quare venditor post tempus, quo emtor in moram moralem constitutus, ad minimam tantum diligentiam in re emtori exhibendam, et inde ad dolum et latam culpam tantum præstandam obligatur. L. 68. de C. E. V. L. 5. L. 16. L. 17. ff. de P. et C. R. V.*

## §. XLVI.

Si venditor rei singularis traditionem ad diem certum obtulerit, et emtor non soluerit, remque subduxerit, tum emtor eo tempore promissum existentiae non reddit, quo moraliter obligatus erat (§. 12. Diff. I. et 20. h. l.) adeoque emtor moram moralem committit (§. 39. Diff. II.) sed venditor post tempus, quo emtor in moram moralem constitutus ad latam culpam et dolum tantum præstandum obligatur (§. præc.) *Quare eo in casu, quo emtor post diem ad rei traditionem a venditore destinatum conventum non soluit, et rem subduxit, venditor ad latam culpam tantum et dolum obligatur L. 5 ff. de P. et C. R. V. L. 51. pr. ff. de A. E. V.*

## §. XLVII.

Propositionem præcedentem cum ex attributis communibus scilicet ex attributis contractus onerosi magis, quam ex attributis emtionis venditioni propriis demonstraverimus (conf. 4. l. 3. t. 2. Elem.) inde quoque de omnibus contractibus onerosis asserere licet, quod nimirum is contrahentium, qui in contractu oneroso alterum  
in

*in moram moralem constituit, post illam, ad diligentiam ordinaria minorem alteri exhibendam obligetur.*

## §. XLVIII.

Emtio venditio *per averfionem* continetur sub emtione venditione rerum singularium (§. 22.) Quare ea, quae hactenus de emtione venditione rerum singularium quoad imputationem dis-  
seruimus, quoque ad emtione venditionem per averfionem pertinent (§. 28, 29, 30. et seq.) Interea tamen, cum in hac utrique contrahentes facto declaraverint, quod in pretium vul-  
gare verum determinandum non consenserint. Inde quoque *in hac emtione venditione laesio, quoad pretii veri determinationem, alias imminens, vel enormis, non attenditur, (§. 36, 37.) conf. Titii juspru. L. 4. t. 2.*

## §. XLIX.

Emtio venditio sub conditione suspensiva inita, ante condi-  
tionis existentiam nondum est perfecta (§. 12, 21.) sed ex emtione  
venditione perfecta concepimus, quod periculum penes venditorem  
esse desinat et penes emtorem esse incipiat. (§. 31.) nisi venditor  
pacto speciali periculum in se suscepit, ex quo ipse venditor ad  
periculum praestandum adhuc obligatur (§. 34. et 35.) Quare *in  
emtione venditione sub conditione suspensiva inita ante conditionem  
existentem nondum desinit penes venditorem esse, neque adeo penes  
emtorem esse incipit. L. 8. pr. ff. de P. et C. R. V. arg. L. 9. L. 10.  
ff. eod. L. 35. §. 5. de Act. Emt. nisi emtor pacto speciali periculum  
in se suscepit, ex quo demum emtor, non autem ex contractu em-  
tionis venditionis in se spectato, ad periculum praestandum obligatur.  
L. 10. ff. eod. Conf. Cocceii Diff. III. §. 25.*

## §. L.

Emtio venditio rerum singularium ad mensuram pondus vel  
numerum est emtio venditio de complexu rerum singularium sub  
ad mensuratione vel annumeratione vel pondere determinato in

alterum transferendo (§. 22.) Quare emtio venditio rerum singularium ad mensuram vel pondus vel numerum est emtio venditio rerum singularium sub conditione suspensiva potestativa, quam ista mensuratio vel annumeratio involuit (§. 5. et. 1.) et consequenter *in emtione venditione rerum singularium ad mensuram vel pondus vel numerum ante actualem admensurationem vel annumerationem periculum est penes emtorem (§. praec.) emtor tamen venditorem ad actualem admensurationem vel annumerationem cogere potest. (§. 3.) L. 10. ff. L. 2. C. de P. et C. R. V. L. 35. §. 5. ff. de A. E. V. tempus inter quod commensuratio ista fieri debet pacto huic contractui adjecto determinari potest. Conf. Titii jus pr. L. 4. t. 2. §. 29. Struuii synt. I. C. Ex. XXX. §. 13.*

## §. LI.

Cum vero huic emtioni pactum tacitum jamjam perfectum in sit de actuanda admensuratione (§. 3. et 50.) Inde utrique *contrahentes damna dolo lata culpa vel leui in rebus istis singularibus data sibi invicem reparare obligantur. (§. 28. et 29.)* ita, ut emtor vel saltem a pretio partem, pro conditione damni in re singulari a venditore dati, detrahere valeat.

## §. LII.

Emtio venditio sub conditione scripturae supra illam conficiendae est emtio venditio sub conditione suspensiva potestativa confecta, (§. 16. et 20.) Verum unus paciscentium alteri ad conditionem potestativam suspensivam existentiae reddendam obligatur, (§. 3.) et in emtione venditione sub conditione suspensiva inita ordinarie periculum est penes venditorem (§. 49.) Quare *in emtione venditione sub conditione scripturae supra illam conficiendae periculum quidem ordinarie penes venditorem esse debet, unus autem alterum, qui scripturam in se suscipit, ad eam conficiendam cogere potest. pr. Inst. de E. V. L. 17. c. de fid. Instr.*

## §. LIII.

## §. LIII.

Emtio venditio rei futuribilis nobis propriæ continet pactum, cujus objectum est res externa nondum existens, propius tamen existentiae simplici et dominii nostri accedens. (§. 23.) Sed res nondum existens omnimode determinata non est, quam quæ per existentiam determinatur, uti ex Logicis constat. Quare emtio venditio rei nobis propriæ futuribilis continet pactum, cujus objectum omnimode determinatum non est, quod autem existentia quædam rei futuribilis demum determinatur. Pactum consensu mutuo in idem placitum determinatum absoluitur. *Quare emtio venditio rei futuribilis nobis propriæ continet pactum, quo consensus mutuus in idem placitum sub existentia rei nobis propriæ futuribilis determinatur, et consequenter pactum initum sub conditione suspensiva et potestativa, quatenus a nostra opera existentia rei nobis propriæ dependet conf. Titii jus priv. L. 4. t. 2. §. 6.*

## §. LIV.

Emtio venditio spei nostræ juridicæ continet pactum, cujus objectum est res existens, nondum quidem sub dominio nostro, ejusdem tamen existentiae propius accedens (§. 23.) Res existens quidem, nondum vero sub nostro dominio, ejusdem tamen existentiae propius accedens vel saltem quoad existentiam Domini nostri non potest considerari tanquam res externa, circa quam nostra proprietates omnimode determinata. (conf. §. 10. et 17. l. 2. t. 2. Elem.) Unde ad modum demonstrationis præcedentis apparet, quod emtio venditio spei nostræ juridicæ sit emtio venditio quædam inita sub conditione suspensiva et quodammodo potestativa, quatenus opera nostra effici potest, ut res illa existens dominio nostro subiciatur.

## §. LV.

Emtio venditio rei nobis propriæ futuribilis est emtio venditio sub existentia rei nobis propriæ futuribilis, tanquam sub conditio-

ne

ne suspensiva inita (§. 53.). Quare *existentia illius rei pactitiae plane cessante seu deficiente emtio venditio plane expirat*, (§. 8.) et consequenter emtor, nihil solvere tenetur (§. 20.) *L. 8. ff. de C. E. V. Subsecuta autem existentia illius rei pactitiae, licet minimae, emtio venditio perficitur et emtor ad pretium promissum soluendum obligatur.* (§. 24.)

*Corollarium.* Id quod applicari potest ad emtionem venditionem fructuum ex re nostra nasciturorum (§. 25.) conf. TITII *Ius pr. l. c.*

## §. LVI.

Emtio venditio rei nobis propriae futuribilis, est emtio venditio inita sub existentia rei futuribilis pactitiae tanquam sub conditione suspensiva et potestativa, quatenus existentia rei ab operis nostris dependet (§. 53.) Pactum sub conditione suspensiva potestativa continet pactum tacitum, ad actuandam vel saltem opera nostra non impediendam conditionem, (§. 3.) Quare *circa emtionem venditionem rei futuribilis venditor ex pacto tacito obligatur vel saltem ad interesse emtori praestandum, si dolo vel lata vel levi culpa existentiam rei futuribilis pactitiae impediuerit*, (§. 24. 28. et 29. *L. 8. pr. ff. de contr. E. V.*

## §. LVII.

Emtio venditio fructuum nostrorum immaturorum potest considerari, tanquam emtio venditio rei singularis et quidem ordinarie per auersionem (§. 26.) Quare *sub hac consideratione in emtione venditione fructuum immaturorum periculum ordinarie est penes emtorem* (§. 48. et 31.) *venditor tamen ad damna dolo, lata vel levi culpa in fructibus data, emtori reparanda obligatur* (§. 18. et 28. 29.) *L. 39. §. 1. L. 78. §. f. ff. de C. E. V. L. 21. pr. L. 25. ff. de A. E. V.* Interea non implicat, quin venditor periculum vel custodiam pacto huic contractui adiecto in se suscipiat, tum obligatio venditoris ex (§. 30. 34. 35.) determinatur.

## §. LVIII.

Emtio venditio spei nostrae iuridicae est emtio venditio inita sub acquisitione dominii rei cuiusdam existentis, tanquam sub con-  
ditione



ditione suspensiva, (§. 54. *Quare subsequuta actu acquisitione domini rei existentis licet minimae emtio venditio spei perficitur. (§. 11.) et inde emtor ad pretium promissum venditori soluendum obligatur.* Verum si venditor nullam prorsus rem existentem dominio suo subiiciat, tum quoque secundum principia supra stabilita emtio venditio spei expirare deberet. (§. 8.) at inde ex emtione venditione quidem emtor secundum principia nostra non teneretur ad pretium soluendum (§. 20.) id, quod tamen contrariari videtur *L. 8. §. 1. ff. d. C. E. V. L. 12. ff. de A. E. V.* Interea tamen cum huic negotio fortuna cumprimis adhaerescat. Inde haud inconueniens a Titio huic emtioni venditioni spei pactum fortuitum attribuitur conf. Eiusd. *Ius pr. L. IV. c. 15. §. 16.*) Ex facto enim emtoris, qui incertitudinem huius obiecti pacticii sibi repraesentat, colligi potest, quod periculum huius obiecti pacticii in se suscipiat, et intuitu lucri insignis futuri, quod fortuna curat, pecuniam promittit, quod promissum sub iisdem circumstantiis alter, qui h. l. venditor est, acceptat. Quum igitur promissum sub existentia vel non existentia euentus, quem fortuna curat, datum, ab altero acceptum pactum fortuitum efficiat (§. 4. Diff. II.) Inde, *licet sub emtione venditione spei plane nihil acquiratur, tamen ex pacto fortuito emtor ad pretium soluendum obligatus dici possit. (§. 1. 2. Diff. II.)* Huic sententiae et Celeb. CRAMERVM *Marpurg.* in specim. de acquir. emr. vend. spec. §. XIX. accessisse video. Verum enim vero sub hac hypothese iste contractus, quem emtione spei vocant, non satis conueniens ita appellatur, cum potius plane fortuitus dici deberet secundum Titium l. c.

## §. LIX.

Emtio venditio spei nostrae continet pactum initum sub conditione suspensiva et potestatiua, quatenus opera effici potest, ut res illa existens dominio nostro subiiciatur. (§. 54.) Cum autem

D

pa-

factum sub conditione suspensiuu potestatiu initium, contineat pactum de conditione illa vel existentiae reddenda, vel saltem non impedienda (§. 3.) Inde quoque in hac emtione venditione spei venditor ex pacto tacito obligatur. quantum in ipso est, operis suis efficere, ut res illa existens pactitia suo dominio subiciatur adeo acquisitio illa domini dolo vel lata vel leui culpa venditoris imputata ipsi ad interessẽ emtori soluendum imputatur (§. 28. 29.) L. 11. §. ult. ff. de A. E. V.

## §. LX.

Coroll. Id quod in præc. §§. 58 59. eruiamus, ad emtione venditionem rerum instante venatione aut piscatione aut aucupio acquirendarum, vi §. 27. venit applicandum.

## §. LXI.

Hereditas nobis delata sed nondum adita, considerari potest, tanquam res externa existens dominio quidem nostro nondum subiecta, ad quam tamen acquirendam nobis ius hereditarium competit. conf. §. 136. l. 2. t. 2. Elem. Cum autem fructus existentes, nostri pendentes seu immaturi etiam considerentur tanquam res externae existentes ante perceptionem dominio nostro nondum subiectae, ad quos tamen acquirendos seu percipiendos nobis competit ius (§. 36. 40.) l. 2. t. 2. Elem. adde §. 5. l. 2. t. 1. l. c. Quare emtio venditio hereditatis nobis delatae, sed nondum aditae emtioni venditioni fructuum nostrorum immaturorum acquipollet. (§. 26) et inde ope principii reductionis in emtione venditione hereditatis delatae, sed nondum aditae periculum est penes emtorem, venditor tamen emtori damnum praestare debet, si dolo vel lata vel leui culpa factum, quo minus hereditas ad emtorem perueniret (§. 57.) L. 2. §. 4. L. ult. ff. de hered. et act. vendita.

Coroll.

*Coroll.* Posterius mutatis mutandis ad emtionem venditionem iuris cuiusdam ciuilis et cum eodem connexae actionis venit applicandum cuius notionem §. 25. l. 3. t. 5. Elem. cui.

## §. LXII.

Emtio venditio generis inuoluit emtionem venditionem initam sub conditione suspensiuâ potestatiuâ, quam sola quidem actualis omnimoda tamen generis placiti determinatio, quorsum etiam, ut aiunt, demonstratio pertinet, inuoluit (§. 18.) Quare *in emtione venditione generis ante actualem et omnimodam generis placiti determinationem periculum est penes venditorem post eam penes emptorem (§. 39.) et tunc venditori damna in re designata dolo vel lata vel leui culpa data ad reparationem imputantur. (§. 28. 29.) L. 14. §. 1. in fine ff. de P. et C. R. V.*

## §. LXIII.

Emtio venditio quantitatis est quaedam emtio venditio sub actuali designatione placiti generis coniuncta, cum annumeratione tanquam conditione suspensiuâ potestatiuâ inita (§. 17.) Verum emtio venditio sub conditione suspensiuâ inita post conditionis existentiam demum perfecta redditur, unus autem contrahens alteri ad existentiae reddendam conditionem obligatur (§. 49. t. 5. 50.) Quare *emtio venditio quantitatis ante actualem designationem generis ab utrisque placiti coniunctam cum annumeratione non perficitur, unus tamen contrahens ex eadem obligatur ad actuandam determinationem generis numericam placitam. L. 35. §. 5. ff. de et C. V. conf. COCCII Diff. III. 25.*

## §. LXIV.

Emtio venditio sub conditione suspensiuâ inita, conditione illa existente fingitur actû ab initio pure inita. (§. 11.) Verum emtio ven-

ditio sub actuali designatione eiusdem generis placiti, cum annumeratione coniuncta, tanquam conditione suspensiuā inita; et actualis designatio placiti generis cum annumeratione coniuncta efficit, ut genus illud determinetur, seu in rem singularem degeneret, (§. 17.) Quare emptio venditio quantitatis post actualem determinationem generis numericam ab utrisque placitam in emtionem rei singularis degenerat. Verum emptio venditio rei singularis etiam sub quadam conditione suspensiuā iniri potest (§. 21.) Inde non implicat quin emptio venditio quantitatis ita iniatur ut post subsecutam quoque determinationem generis numericam alia conditio suspensiuā accedat.

## §. LXIV.

Si genus iudicium designatur cum actuali annumeratione ab utrisque placita, tunc quantitas commensuratur (§. 113. Diff. I.) Quare emptio venditio quantitatis post commensurationem degenerat in emtionem venditionem rei singularis (§. præc.) sed in emtione rei singularis ordinarie periculum est penes emptorem, nisi de conditione suspensiuā quadam inter contrahentes constet. (§. 31. 31) quare in emtione venditione quantitatis post commensurationem periculum est penes emptorem, nisi de alia conditio suspensiuā a commensuratione adhuc diuersa constet inter emptorem et venditorem L. 1. §. 1. L. 5. L. 35. §. 5. et 7. L. 14. §. 1. de P. et C. R. V.

## §. LXVI.

In emtione venditione quantitatis post commensurationem periculum est penes emptorem, nisi de alia conditione suspensiuā ab hac commensuratione diuersa inter contrahentes constet. (§. præc.) Verum subsecuta post commensurationem ab emptore ob signatione ordinarie de alia conditione suspensiuā, a commensuratione diuersa, haud constat, id quod ex communi vita desumi.

sumi licet. *Quare in Emtione venditione quantitatis subsecuta post commensurationem ab emtore obsignatione ordinarie periculum apud emtorem est asserendum* L. 2. C. de P. et C. R. V. conf. et IL-  
LUSTR. RECHENB. Tr. Reg. Iur. pr. III. t. 13. §. 14.

## §. LXVII.

Emtio venditio quantitatis post commensurationem et ob-  
signationem in emtione venditionem rei singularis degenerat  
(§. praec.) cum autem in emtione venditione rei singularis vendi-  
tor custodiam vel ad diem certum pacto speciali suscipit, vel minus  
(§. 30.) *Inde in emtione venditione quantitatis post commensuratio-  
nem venditor adhuc pacto speciali vel ad diem certum damna, leuissi-  
ma etiam culpa in re data reparare obligatur* (§. cit.) post eam  
autem vel si plane nullus dies adiectus, emtor a venditore inter-  
pellatus et rem non subducens, in moram moralem constituitur  
et efficit, ut venditor tantum dolum et latam culpam praestet.  
(§. 45. 46.) L. 5. L. 17. ff. de P. et C. R. V.

## §. LXVIII.

Emtio venditio per auersionem est emtio venditio rei singula-  
ris (§. 22) Vnde quoque in *emtione venditione per auersionem, si  
venditor adhuc ad diem certum pacto speciali custodiam in se susce-  
perit, venditor, ad diem istum designatum, damna leuissima etiam  
culpa data, reparare tenetur* (§. 38.) post eum autem vel si plane nul-  
lus dies adiectus, emtor a venditore interpellatus, rem non aue-  
bens in moram moralem constituitur et efficit, ut venditor tantum  
dolum et latam culpam praestet (§. 46. 673.) L. 4. §. 1. ff. de P. et  
C. R. V.

## §. LXIX.

In emtione venditione quantitatis post commensurationem  
tum demum periculum est penes emtorem, si de alia suspensiva

D 3

con-

conditione a commensuratione diuersa non constat (§ 64.) Verum si post degustationem cum designatione numerica coniunctam ab utroque placitam, (quæ determinationem generis numericam ab utroque placitam inuoluit,) consensus eorundem paciscentiam sub recognita demum convenientia quantitaris transmissæ cum dato libamento, *determinatur*, tum de alia conditione suspensiuæ ab illa determinatione diuersa constat (§. 5.) Quare in hac emtione venditione quantitatis etiam post degustationem cum designatione numerica ab utrisque placita coniunctam, ante recognitam tamen convenientiam vini transmissi cum dato libamento periculum est penes venditorem et post eam demum recognitionem ad emtorem (§. 49.) TITII Iuspr. L. 4. c. 6. §. 27.

## §. LXX.

Addictio in diem est emtio venditio sub conditione resoluitiua inita (§. 21.) sed pactum sub conditione resoluitiua ab initio est perfectum (§. 5.) Quare addictio in diem inuoluit emtionem venditionem ab initio perfectam; sed in emtione venditione perfecta periculum est penes emtorem (§. 31.) Quare in Additione in diem periculum est penes emtorem L. 2. in fin. L. 3. ff. de in diem.

## §. LXXI.

Si intra tempus conuentum in additione in diem alius emtor maius pretium offerens existat, tum existit conditio emtioni vinditori sub conditione resoluitiua adiecta (§. 21.) Quare addictio in diem expirat, si intra tempus alius emtor maius pretium venditori offerat. (§. 14.) Interea tamen & priori emtori licet plus addicere L. 7. ff. de in diem Addict.

## §. LXXII.

Emtor ex emtione venditione perfecta obligatur ad reparandum damnum dolo lata et leui culpa venditori datum, (§. 28 29.)  
Emtio

Emtio venditio sub conditione resolutiva inita est emtio venditio perfecta et expirat, si intratempus alius emtor maius pretium venditori offerat. (§. prae.) Quare emtor prior *ex emtione venditione sub conditione resolutiva inita, et ex post facto conditione illa existente expirata ad damnum dolo, lata et leui culpa in re venditori datum, reparandum obligatur* L. 14. §. 1. ff. de in diem addi&.

## §. LXXIII.

Emtor, qui in emtione venditione sub conditione resolutiva inita alium emtorem maius quidem pretium offerentem, sed minus idoneum subiicit venditori, sciens utitur viribus ad emtione venditionem iam perfectam dissoluendam (§. 71.) sed is, qui sciens utitur viribus ad pactum iustum iam perfectum dissoluendum, ei, in quod pacto iusto perfecto iam consensit, animo deliberato disconvenienter agit, consequenter dolose alterum laedit (§. 13. Diff. 11.) Quare emtor supra determinatus venditorem dolose laedit; Cum autem venditor per alium emtorem maius quidem pretium offerentem sed minus idoneum, malum sentiat. Inde constat, quod emtor supra determinatus efficiat, ut venditor malum sentiat ortum ex dolosa laesione prioris emtoris, adeoque damnum (§. 123. Diff.) Cum autem damnum dolo circa contractum datum sit reparandum (§. 18. Diff. 11.) *Inde emtor, qui in emtione venditione sub conditione resolutiva inita alium majus pretium offerentem, sed minus idoneum subiicit, ad reparandum damnum venditori inde subnatum obligatur* L. 14. ff. §. 1. de in diem addi&.

*Corollar.* ex priori demonstratione mutatis mutandis facile colligitur, quod venditor, qui in emtione venditione sub conditione resolutiva simulaverit meliorem allatam conditionem, emtori ad damnum inde subnatum reparandum obligetur L. 14. pr. ff. de in diem Addi&.

## §. LXXIV.

## §. LXXIV.

*Subhastatio* est addictio in diem publica seu solennis *conf.* IL-  
LUSTR. RECHENB. (*Tr. L. III. t. 12. §. 12.*) Quare penes emto-  
rem post terminum subhastationis, etiam si in alio, uberioris pretii  
oblatio adhuc reliqua, est periculum (§. 70.) (*conf. L. 2. 4.) et t. t.*  
*3. L. 16. de fid. et iur. bast. fisc. de adject. conf. O. P. S. R. t. 39. §. 9.*

## §. LXXV.

*Lex commissoria* est emptio venditio ab initio pura, qua tamen  
eodem tempore haud secuta intra certum tempus pretii solutione  
dissensus mutuus eodem contractu determinatur L. 1. 2. 4. pr. de C.  
Commis. adeoque lex commissoria involuit emtionem quandam  
venditionem sub conditione resolutive in initam (§. 21, 5, 9) Vnde ex  
*Lege Commissoria* emptor haud soluto intra tempus conuentum pretio  
efficit, ut emptio venditio exspiret (§. 71.) obligatur tamen ad damna  
dolo lata et leui culpa in re data venditori reparanda (§. 22.) L. 4.  
pr. §. ult. ff. de Lege Commissoria.

Supplenda §. 16. l. 3. conditione suspensiva potestativa

l. 4. conditione suspensiva potestativa §. 20.

l. 4. externa pro certa pecunia.

§. 1. penes, leg. penes venditorem, post eam penes emptorem.

